


**Los ntawm Thawj  
Tswj Hwm Henry B. Eyring**

Tus Pab Cuam thib Ib hauv  
Thawj Pawg Thawj Tswj Hwm



# Hloov Los Ua cov Thwj Tim Tiag

**N**yob hauv txhua txoj kev sib ntsib txais lub cim nco txog, peb muaj cib fim cog lus rau Leej Txiv Saum Ntuj Ceeb Tsheej hais tias peb yeej yuav nco ntsoov tus Cawm Seej thiab ua raws li Nws tej lus txib peb thiaj yuav muaj Nws tus Ntsuj Plig nrog peb nyob (saib Maulaunais 4:3; 5:2; Q&K 20:77, 79). Yuav yooj yim rau peb nco ntsoov nws thaum peb ris Nws lub npe. Muaj ntau yam peb ua tau kom ris Nws lub npe tiam sis qhov tseem ceeb yog thaum peb ris Nws lub npe pab lwm tus, nyeem Nws tej lus dawb huv, thiab thov kom paub tias Nws xav kom peb ua li cas.

Twb muaj li no rau kuv thaum kuv muab ib tug tub hluas ua kev cai raus dej. Kuv paub tias tus Cawm Seej cov tub qhe uas Nws tau tsa tau hu kuv ua ib tug tub txib kom qhia Nws txoj moo zoo thiab ua tim khawv txog Nws thiab Nws lub Koom Txoos tseeb. Kuv tus khub wb tau cog lus rau tus tub hluas no hais tias yuav muab nws ntxuav kom huv dhau los ntawm lub hwj chim ntawm Yexus Khetos txoj Kev Theej Txhoj thaum tus tub hluas hloov siab lees txim nrog kev ntseeg tus Cawm Seej thiab cia Nws ib tug tub qhe uas Nws tso cai rau muab tus tub hluas ua kev cai raus dej.

Thaum kuv tsa tus tub hluas tawm cov dej ntawm lub dab ua kev cai raus dej, nws ntxhi lus hauv kuv pob ntseeg hais tias, “Kuv huv lawm, kuv huv lawm.” Thaum tib lub sij hawm ntawd, kuv nco txog thaum Yauhas tau muab tus Cawm Seej ua kev cai raus dej nyob hauv tus Dej

Yauladees. Tsis tas li ntawd xwb, kuv nco qab tias kuv twb ua txoj hauj lwm cawm tib neeg uas yog tus Cawm Seej uas tau sawv rov los thiab muaj txoj sia txoj hauj lwm—nrog rau tus Vaj Ntsuj Plig Dawb Huv, ib yam li Yauhas.

Rau kuv thiab rau peb txhua tus, peb ua tau ntxiv kom nco txog tus Cawm Seej tshaj qhov uas peb xav txog peb txoj kev txawj ntse thiab kev paub txog Nws xwb. Peb xaiv tau ua tej yam txhua hnuv uas ua rau peb los nyob ze Nws niaj hnuv nim no.

Tej zaum qhov yooj yim tshaj yog kev nyeem vaj lug kub. Thaum peb ua li ntawd, peb yuav hnov Nws nyob ze peb. Rau kuv mas, ua rau kuv nyob ze ntau tshaj thaum kuv nyeem Phau Ntawv Maumoos. Nyob hauv thawj ob peb feeb uas kuv nyeem tej tshooj ntawm 2 Nifais, ua rau kuv hnov Nifais thiab Lihais lub suab hauv kuv lub hlwb piav txog tus Cawm Seej zoo li nkawd paub Nws nkawd tus kheej. Ua rau kuv xav tias kuv nyob ze Nws.

Rau nej mas, tej zaus lwm nqe vaj lug kub ua rau nej los nyob ze Nws. Tiam sis thaum twg thiab qhov twg nej nyeem Vajtsv txoj lus, nrog kev txo hwj chim thiab kev xav nco txog tus Cawm Seej tiag tiag, nej yuav haj yam xav ris Nws lub npe hauv nej lub neej txhua hnuv.

Qhov uas nej xav li ntawd yuav hloov nej txoj kev ua hauj lwm hauv tus Tswv lub Koom Txoos. Nej yuav thov Leej Txiv Saum Ntuj Ceeb Tsheej kom pab nej rau siab ua ib txoj hauj lwm txawm zoo nkaus li yog ib txoj hauj lwm me me xwb los. Kev pab uas nej thov yog kev pab nej tsis

xav txog nej tus kheej thiab tsoom ntsoov rau tej yam uas tus Cawm Seej xav ua rau cov uas Nws hu nej pab.

Kuv twb hnov tau Nws txhais tes pab thiab Nws txoj kev nyob ze thaum kuv ua hauj lwm pab wb cov me nyuam thaum kuv tau thov Vajtsww kom paub pab lawv nrhiav kev kaj siab lug uas los ntawm txoj moo zoo xwb. Thaum tej lub sij hawm zoo li no, ua rau kuv tsis xav txog qhov uas lwm tus saib kuv yog leej txiv zoo li cas, tiam sis kuv yeej xav kom kuv cov me nyuam tau zoo thiab vam meej.

Qhov uas peb xav pub tej yam uas tus Cawm Seej yuav pub rau lawv ua rau peb thov Vajtsww uas yeej yog kev *taij thov* Leej Txiv Saum Ntuj Ceeb Tsheej, los ntawm Yexus Khetos lub npe tiag tiag. Thaum peb thov li ntawd—los ntawm tus Cawm Seej lub npe, nrog kev ntseeg Nws—Leej Txiv yeej yuav teb. Nws xa tus Vaj Ntsuj Plig Dawb Huv los koj peb, nplij peb lub siab, thiab yam peb. Vim tus Ntsuj Plig yeej ua tim khawv txog tus Cawm Seej (saib 3 Nifais 11:32, 36; 28:11; Ethaws 12:41), ua rau peb txoj kev txawj hlub tus Tswv kawg siab kawg ntsws, kawg dag kawg zog (saib Malakaus 12:30; Lukas 10:27; Q&K 59:5).

Cov koob hmoov ntawm kev nco txog Nws tam sim no thiab txhua hnuv yuav maj mam los zuj zus thaum peb ua hauj lwm rau Nws, mloog ntsoov Khetos tej lus, thiab muaj kev ntseeg thov Vajtsww los ntawm Nws lub npe. Thiab txoj kev nco ntsoov no yuav ua rau peb hloov los ua cov thwj tim tseeb ntawm tus Tswv Yexus Khetos nyob hauv Nws lub nceeg vaj hauv lub ntiaj teb no—thiab nrog Nws Leej Txiv nyob hauv lub ntuj tom ntej uas muaj yeeb koob.

## QHIA LOS NTAWM TSAB XOY NO

Thawj Tswj Hwm Eyring ntuas peb kom nco ntsoov tus Cawm Seej los ntawm tej yam peb xaiv ua txhua hnuv kom los nyob ze Nws. Nrog cov uas koj qhia, tej zaum koj yuav xav nyeem ob zaj lus thov Vajtsww rau lub cim nco txog, uas hais txog txoj kev khi lus tias peb yuav nco ntsoov Nws (saib Maulaunais 4:3; 5:2; Q&K 20:77, 79). Xav seb puas tsim nyog caw cov uas koj qhia kom lawv sau tej yam lawv ua tau txhua hnuv kom nco ntsoov tus Cawm Seej. Tej zaum koj yuav xav caw lawv ib leeg thov Leej Txiv Saum Ntuj Ceeb Tsheej pab ib leeg

kom tau zoo thiab vam meej. Xav seb koj puas xav thov Vajtsww rau lawv zoo ib yam li ntawd.

## COV HLUAS

### Nco Ntsoov tus Tswv Txhua Hnuv

**K**ev ntaus phooj ywg, kev ua dej num, kev kawm ntawv, TV—muaj ntau yam uas peb yuav tsum tsoom ntsoov rau. Tiam sis txhua lub lim tiam, peb cog lus rau Leej Txiv Saum Ntuj Ceeb Tsheej “hais tias [peb] nco ntsoov txog [Nws Leej Tub, Yexus Khetos]” (Q&K 20:79).

Thawj Tswj Hwm Eyring hais tias peb “xaiv tau tej yam txhua hnuv” uas pab peb nco txog tus Cawm Seej. Xav seb puas xav cuab hom phiaj lub hlis no kom nco txog tus Cawm Seej ntxiv txhua hnuv. Tej zaum koj ua tau ib daim qhia hnuv hli thiab cog lus tias koj yuav ua ib yam txhua hnuv kom sib raug zoo nrog Nws. Thawj Tswj Hwm Eyring hais txog tej yam xws li kev nyeem vaj lug kub, muaj kev ntseeg thov Vajtsww, thiab teev tiam tus Cawm Seej thiab pab lwm tus. Kuj muaj kev sau hauv phau ntawv ceev xwm txheej, kev koom kev sib ntsib ntawm lub Koom Txoos, kev mloog lub tuam rooj sab laj, kev mus rau lub tuam tsev, hu tej zaj nkauj qhuas Vajtsww—thiab ntxiv! Thaum peb nco txog tus Cawm Seej txhua hnuv, Thawj Tswj Hwm Eyring cog lus tias “cov koob hmoov . . . yuav maj mam los zuj zus . . . [thiab] yuav pab peb hloov los ua cov thwj tim ntawm tus Tswv Yexus Khetos tiag tiag.”

## COV ME NYUAM

### Kev Hlub Ntau Heev

**T**haum peb nyeem cov vaj lug kub los yog thov Vajtsww, peb paub tias Leej Txiv Saum Ntuj Ceeb Tsheej thiab Yexus hlub peb npaum li cas. Cia li kos duab kos tej lub plawv me me nyob hauv ib lub plawv loj zog. Pleev xim rau ib lub plawv txhua lub sij hawm koj thov Vajtsww los yog nyeem vaj lug kub. Koj yuav ua dab tsi ntxiv kom koj nyob ze Leej Txiv Saum Ntuj Ceeb Tsheej thiab Yexus?



# Muab Kev Hlub rau cov uas Mus Yuam Kev

*Ua tib zoo thov Vajtswv kawm tej yam no thiab nrhiav kev tshoov siab seb koj yuav tsum qhia dab tsi. Qhov uas Vajtswv cov ntxhais to taub lub hom phiaj ntawm lub Koom Haum Niam Tsev yuav npaj lawv li cas kom txais tau cov koob hmoov ntawm txoj sia nyob mus ib txhis?*

**Kev Ntseeg Tsev Neeg  
Kev Pab**

**T**hawj Tswj Hwm Dieter F. Uchtdorf, tus Pab Cuam thib Ob hauv Thawj Pawg Thawj Tswj Hwm hais tias, “Qhov tseeb yog tsis muaj tsev neeg zoo tag nrho. Txawm nej tsev neeg muaj teeb meem dab tsi, txawm nej yuav tsum ua li cas kom kho tau, qhov tseem ceeb tshaj plaws yog kev siab hlub, Khetos txoj kev hlub dawb paug.”<sup>1</sup>

Hais txog cov uas tsis tshua muab siab rau ntseeg txoj moo zoo, Linda K. Burton, tus Tuam Thawj Tswj Hwm ntawm lub Koom Haum Niam Tsev dhau los, hais tias: “Leej Txiv Saum Ntuj Ceeb Tsheej hlub tag nrho Nws cov me nyuam. . . . Txawm lawv nyob qhov twg los—taug txoj kev los yog tawm txoj kev los—Nws xav kom lawv rov qab los tsev.”<sup>2</sup>

Thawj Tswj Hwm Joseph F. Smith (1838–1918) hais tias, “Txawm [koj cov me nyuam] yuav mus ua loj leeb npaum li cas los, . . . thaum koj hais lus rau lawv, cia li tsis txhob npau taws, tsis txhob ua nruj, los yog raug txim rau lawv. Cia li hais lus zoo rau lawv.”<sup>3</sup>

Txwj Laug Brent H. Nielson ntawm Pawg Xya Caum hais txog tej uas tus Cawm Seej piav rau cov uas muaj 10 lub nyiaj thiab poob ib lub: “Nrhiav mus txog thaum yus nrhiav tau. Thaum tus uas tau ploj lawm yog nej tus tub los sis tus ntxhais, nej tus kwv tij los sis nej tus muam, . . . tom qab peb ua txhua yam peb ua tau, peb yuav tsum hlub tus neeg ntawd kawg siab kawg ntsws. . . .

“Thov kom peb yuav txais kev tshwm sim kom peb paub zoo tias peb yuav ua li cas rau cov neeg uas poob thiab thaum yuav tsum ua, ua siab ntev thiab muaj kev hlub zoo li peb Leej Txiv Saum Ntuj Ceeb Tsheej thiab Nws Leej Tub, Yexus Khetos, thaum peb hlub, saib thiab tos ntsoov tus tub ua txhaum.”<sup>4</sup>

Thawj Tswj Hwm Henry B. Eyring, tus Pab Cuam thib Ib hauv Thawj Pawg Thawj Tswj Hwm, hais tias: “Kuv tau muaj siab rau ntseeg thov Vajtswv kom ib tug neeg uas kuv hlub yuav nrhiav thiab hnov lub hwj chim ntawm txoj Kev Theej Txhoy. Kuv tau muaj siab rau ntseeg thov Vajtswv kom tib neeg uas yog

tim tswv yuav los pab lawv, thiab lawv yeej tau los.

“Vajtswv ntaus tswv yim los pab cawm Nws txhua tus me nyuam kom dim.”<sup>5</sup>

## **Vaj Lug Kub thiab tej Ntaub Ntaww Xov Xwm Ntxiv**

Mathais 18:12; Amas 31:35; 3 Nifais 13:32; Q&K 121:41–42  
[reliefsociety.lds.org](http://reliefsociety.lds.org)

### **LUS CIM**

1. Dieter F. Uchtdorf, “Qhuas Cov uas Cawm Lwm Tus,” *Liahona*, Tsib Hlis Ntuj 2016, 79, 80.
2. Linda K. Burton, nyob hauv Sarah Jane Weaver, “Sister Burton, Sister Wixom Visit Church’s Pacific Area,” *Church News*, Plaub Hlis Ntuj 2, 2013, [lds.org/church/news](http://lds.org/church/news).
3. *Teachings of Presidents of the Church: Joseph F. Smith* (1998), 254.
4. Brent H. Nielson, “Tos tus Neeg Loj Leeb,” *Liahona*, Tsib Hlis Ntuj 2015, 103.
5. Henry B. Eyring, “Rau Kuv cov Xeeb Leej Xeeb Ntxwv,” *Liahona*, Kaum Ib Hlis Ntuj 2013, 71.

### **Xav Txog Qhov No**

Peb yuav ua li cas muaj kev siab hlub rau cov uas tsis xav ua neej raws li tej ntsiab cai ntawm txoj moo zoo?